

大般涅槃經

第一

百九二  
通一

47994



元祿九年丙子二月日重脩

皇圖瓊閣 帝齋綴昌

佛日增輝 懋容輪奐轉

山城州天安寺法金剛院置



大般涅槃經卷第一

北涼天竺三藏曇無讖奉 詔譯

大般涅槃經壽命品第一之一

如是我聞一時佛在拘尸那國力士生地阿利  
羅拔提河邊娑羅雙樹間爾時世尊與大比丘  
八十億百千人俱前後圍繞二月十五日臨涅槃  
時以佛神力出大音聲其聲徧滿乃至有頂  
隨其類音普告衆生今日如來應正徧知憐愍  
衆生覆護衆生等視衆生如羅睺羅為作歸依  
屋舍室宅大覺世尊將欲涅槃一切衆生若有  
所疑今悉可問為最後問爾時世尊於晨朝時  
從其面門放種種光其明雜色青黃赤白頗黎



瑪瑙光徧照此三千大千佛之世界乃至十方  
亦復如是其中所有六趣衆生遇斯光者罪垢  
煩惱一切消除是諸衆生見聞是已心大憂愁  
同時舉聲悲啼號哭嗚呼慈父痛哉苦哉舉手  
拍頭推背叫喚其中或有身體顫慄涕泣哽噎  
爾時大地諸山大海皆悉震動時諸衆生共相  
謂言且各裁抑莫大愁苦當疾往詣拘尸那城  
力士生處至如來所頭面禮敬勸請如來莫般  
涅槃住世一劫若減一劫互相執手復作是言  
世間空虛衆生福盡不善諸業增長出世仁等  
今當速往速往如來不久必入涅槃復作是言  
世間空虛世間空虛我等從今無有救護無所

宗仰貧窮孤露一旦遠離無上世尊設有疑惑  
當復問誰時有無量諸大弟子尊者摩訶迦旃  
延尊者薄俱羅尊者優波難陀如是等諸大比  
丘遇佛光者其身顫掉乃至大動不能自持心  
濁迷悶發聲大喚生如是等種種苦惱爾時復  
有八十百千諸比丘等皆阿羅漢心得自在所  
作已辦離諸煩惱調伏諸根如大龍王有大威  
德成就空慧逮得已利如旃檀林旃檀圍繞如  
師子王師子圍繞成就如是無量功德一切皆  
是佛之真子於其晨朝日始初出離常住處嚼  
楊枝時遇佛光明並相謂言仁等速疾漱口澡  
手作是言已舉身毛豎徧體血現如波羅奢華

涕泣盈目生大苦惱爲欲利益安樂衆生成就  
大乘第一空行顯發如來方便密教爲不斷絕  
種種說法爲諸衆生調伏因緣故疾至佛所稽  
首佛足繞百千币合掌恭敬却坐一面爾時復  
有拘陀羅女善賢比丘尼優波難陀比丘尼海  
意比丘尼與六十億比丘尼等一切亦是太阿  
羅漢諸漏已盡心得自在所作已辦離諸煩惱  
調伏諸根猶如大龍有大威德成就空慧亦於  
晨朝日初出時舉身毛豎徧體血現如波羅奢  
華涕泣盈目生大苦惱亦欲利益安樂衆生成  
就大乘第一空行顯發如來方便密教爲不斷  
絕種種說法爲諸衆生調伏因緣故疾至佛所

稽首佛足繞百千匝合掌恭敬却坐一面於比丘尼衆中復有諸比丘尼皆是菩薩人中之龍位階十地安住不動爲化衆生現受女身而常脩習四無量心得自在力能化作佛爾時復有一恒河沙菩薩摩訶薩人中之龍位階十地安住不動方便現身其名曰海德菩薩無盡意菩薩如是等菩薩摩訶薩而爲上首其心皆悉敬重大乘安住大乘深解大乘愛樂大乘守護大乘善能隨順一切世間作是誓言諸未度者當令得度已於過世無數劫中脩持淨戒善持所行解未解者紹三寶種使不斷絕於未來世當傳法輪以大莊嚴而自莊嚴成就如是無量功

德等觀衆生如視一子亦於晨朝日初出時遇  
佛光明舉身毛豎徧體血現如波羅奢華涕泣  
盈目生大苦惱亦爲利益安樂衆生成就大乘  
第一空行顯發如來方便密教爲不斷絕種種  
說法爲諸衆生調伏因緣故疾至佛所稽首佛  
足繞百千匝合掌恭敬却坐一面爾時復有二  
恒河沙等諸優婆塞受持五戒威儀具足其名  
曰威德無垢稱王優婆塞善德優婆塞等而爲  
上首深樂觀察諸對治門所謂苦樂常無常淨  
不淨我無我實不實歸依非歸依衆生非衆生  
恒非恒安非安爲無爲斷非斷涅槃非涅槃增  
上非增上常樂觀察如是等法對治之門亦欲

樂聞無上大乘如所聞已能爲他說善持淨戒  
渴仰大乘旣自充足復能充足餘渴仰者善能  
攝取無上智慧愛樂大乘守護大乘善能隨順  
一切世間度未度者解未解者紹三寶種使不  
斷絕於未來世當轉法輪以大莊嚴而自莊嚴  
心常深味清淨戒行悉能成就如是功德於諸  
衆生生大悲心平等無二如視一子亦於晨朝  
日初出時爲欲闍毗如來身故人人各取香木  
萬束栴檀沈水牛頭栴檀天木香等是一一木  
文理及附皆有七寶微妙光明髣如種種雜綵  
畫飾以佛力故有是妙色青黃赤白爲諸衆生  
之所樂見諸木皆以種種香塗鬱金沈水及膠

香等散以諸華而爲莊嚴優鉢羅華拘物頭華  
波頭摩華分陀利華諸香木上懸五色幡柔輭  
微妙猶如天衣憍奢耶衣芻摩縵綵是諸香木  
載以寶車是諸寶車出種種光青黃赤白棘福  
皆以七寶厠填是一一車駕以駟馬是一一馬  
駿疾如風一一車前豎立五十七寶妙幢具舍  
羅網彌覆其上一一寶車復有五十微妙寶蓋  
一一車上垂諸華鬘優鉢羅華拘物頭華波頭  
摩華分陀利華其華純以真金爲菜金剛爲臺  
是華臺中多有黑蜂遊集其中歡娛受樂又出  
妙音所謂無常苦空無我是音聲中復說菩薩  
本所行道復有種種歌舞伎樂箏笛篳篥簫瑟

鼓吹是樂音中復出是言苦哉苦哉世間空虛  
一一車前有優婆塞擎四寶案是諸案上有種  
種華優鉢羅華拘物頭華波頭摩華分陀利華  
鬱金諸香及餘熏香微妙第一諸優婆塞爲佛  
及僧辦諸食具種種備足皆是栴檀沈水香薪  
八功德水之所成熟其食甘美有六種味一苦  
二酢三甘四辛五鹹六淡復有三德一者輕軟  
二者淨潔三者如法作如是等種種莊嚴至力  
士生處娑羅雙樹間復以金沙徧布其地以迦  
陵伽衣欽婆羅衣及繒綵衣而覆沙上周巾徧  
滿十二由旬爲佛及僧敷置七寶師子之座其  
座高大如須彌山是諸座上皆有寶帳垂諸瓔

珞諸娑羅樹悉懸種種微妙幡蓋種種好香以  
塗樹身種種名華以散樹間諸優婆塞各作是  
念一切衆生若有所乏須食與食須飲與飲須  
頭與頭須目與目隨諸衆生所須之物皆悉給  
與作是施時離欲瞋恚穢濁毒心無餘思惟求  
世福樂唯期無上清淨菩提是優婆塞等皆已  
安住於菩提道復作是念如來今者受我食已  
當入涅槃作是念已身毛皆豎徧體血現如波  
羅奢華涕泣盈目生大苦惱各各齋持供養之  
具載以寶車香木幢幡寶蓋飲食疾至佛所稽  
首佛足以其所持供養之具供養如來繞百千  
匝舉聲號泣哀動天地椎胸大叫淚下如雨復

相謂言苦哉仁者世間空虛世間空虛便自舉  
身投如來前而白佛言唯願如來哀受我等最  
後供養世尊知時默然不受如是三請悉皆不  
許諸優婆塞不果所願心懷悲惱默然而住猶  
如慈父唯有一子卒病喪亡送其屍骸置於冢  
間歸還悵快愁憂苦惱諸優婆塞憂愁苦惱亦  
復如是以諸供具安置一處却在一面默然而  
坐爾時復有三恒河沙諸優婆夷受持五戒威  
儀具足其名曰壽德優婆夷德鬘優婆夷毗舍  
佉優婆夷等八萬四千而為上首悉能堪任護  
持正法為度無量百千衆生故現女身訶責家  
法自觀己身如四毒蛇是身常為無量諸蟲之

所喫食是身臭穢貪欲獄縛是身可惡猶如死  
狗是身不淨九孔常流是身如城血肉筋骨皮  
裹其上手足以爲却敵樓櫓目爲寮孔頭爲殿  
堂心王處中如是身城諸佛世尊之所棄捨凡  
夫愚人常所味著貪淫瞋恚愚癡羅刹止住其  
中是身不堅猶如蘆葦伊蘭水沫芭蕉之樹是  
身無常念念不住猶如電光暴水幻燄亦如畫  
水隨畫隨合是身易壞猶如河岸臨峻大樹是  
身不久當爲狐狼鷄鳥鵲鷲烏鵲餓狗之所食  
噉誰有智者當樂此身寧以牛跡盛大海水不  
能具說是身無常不淨臭穢寧九大地使如棗  
等漸漸轉小猶亭歷子乃至微塵不能具說是

身過患是故當捨如棄涕唾以是因緣諸優婆  
夷以空無相無願之法常脩其心深樂諮受六  
乘經典聞已亦能爲他演說護持本願毀訾女  
身甚可患厭性不堅牢心常脩習如是正觀破  
壞生死無際輪轉渴仰大乘旣自充足復能充  
足餘渴仰者深樂大乘守護大乘雖現女身實  
是菩薩善能隨順一切世間度未度者解未解  
者紹三寶種使不斷絕於未來世當轉法輪以  
大莊嚴而自莊嚴堅持禁戒皆悉成就如是功  
德於諸衆生生大悲心平等無二如視一子亦  
於晨朝日初出時各相謂言今日宜應至雙樹  
間諸優婆夷所設供具倍勝於前持至佛所稽

首佛足繞百千帀而白佛言世尊我等今者爲  
佛及僧辦諸供具唯願如來哀受我供如來默  
然而不許可諸優婆夷不果所願心懷惆悵却  
住一面爾時復有四恒河沙毗耶離城諸離車  
等男女大小妻子眷屬及閻浮提諸王眷屬爲  
求法故善脩戒行威儀具足摧伏異學壞正法  
者常相謂言我等當以金銀倉庫爲令甘露無  
盡正法深奧之藏久住於世願令我等常得脩  
學若有誹謗佛正法者當斷其舌復作是願若  
有出家毀禁戒者我當罷令還俗榮使有能深  
樂護持正法我當敬重如事父母若有衆僧能  
脩正法我當隨喜令得勢力常欲樂聞大乘經

典聞已亦能爲人廣說皆悉成就如是功德其名曰淨無垢藏離車子淨不放逸離車子恒水無垢淨德離車子如是等各相謂言仁等今可速往佛所所辦供養種種具足一一離車各嚴八萬四千大象八萬四千駟馬寶車八萬四千明月寶珠天木栴檀沈水薪束種種各有八萬四千一一象前有寶幢幡蓋其蓋小者周帀縱廣滿一由旬幡最短者長三十二由旬寶幢畢者高百由旬持如是等供養之具往至佛所稽首佛足繞百千帀而白佛言世尊我等今者爲佛及僧辦諸供具唯願如來哀受我供如來默然而不許可諸離車等不果所願心懷愁惱以

佛神力去地七多羅樹於虛空中默然而住爾時復有五恒河沙大臣長者敬重大乘若有異學謗正法者是諸人等力能摧伏猶如雹雨摧折草木其名曰日光長者護世長者護法長者如是之等而爲上首所設供具五倍於前俱共往詣娑羅雙樹間稽首佛足繞百千匝而白佛言世尊我等今者爲佛及僧設諸供具唯願哀愍受我等供如來默然而不受之諸長者等不果所願心懷愁惱以佛神力去地七多羅樹於虛空中默然而住爾時復有毗舍離王及其後宮夫人眷屬閻浮提內所有諸王除阿闍世并及城邑聚落人民其名曰月無垢王等各嚴四

兵欲往佛所是一一王各有一百八十萬億人  
民眷屬是諸車兵駕以象馬象有六牙馬疾如  
風莊嚴供具六倍於前寶蓋之中有極小者周  
巾纒廣滿八由旬幡極短者十六由旬寶幢卑  
者三十六由旬是諸王等皆悉安住於正法中  
惡賤邪法敬重大乘深樂大乘憐愍衆生等如  
一子所持飲食香氣流布滿四由旬亦於晨朝  
日初出時持是種種上妙甘饌詣雙樹間至如  
來所而白佛言世尊我等爲佛及比丘僧設是  
供具唯願如來哀愍受我最後供養如來知時  
亦不許可是諸王等不果所願心懷愁惱却住  
一面爾時復有七恒河沙諸王夫人唯除阿闍

世王夫人為度衆生現受女人常觀身行以空  
無相無願之法熏脩其心其名曰三界妙夫父  
愛德夫人如是等諸王夫人皆悉安住於正法  
中脩行禁戒威儀具足憐愍衆生等如一子各  
相謂言今宜速往詣世尊所諸王夫人所設供  
養七倍於前香華寶幢繒綵幡蓋土妙飲食寶  
蓋小者周帀縱廣十六由旬幡最長者三十六  
由旬寶幢卑者六十八由旬飲食香氣周徧流  
布滿八由旬持如是等供養之具往如來所稽  
首佛足繞百千帀而白佛言世尊我等為佛及  
比丘僧設是供具唯願如來哀愍受我最後供  
養如來知時默然不受時諸夫人不果所願心

懷愁惱自拔頭髮推背大哭猶如新喪所愛之  
子却在四面默然而住爾時復有八恒河沙諸  
天女等其名曰廣目天女而爲上首作如是言  
汝等諸姊妹諦觀諦觀是諸人衆所設種種上妙  
供具欲供如來及比丘僧我等亦當如是嚴設  
微妙供具供養如來如來受已當入涅槃諸姊  
諸佛如來出世甚難最後供養亦復倍難若佛  
涅槃世間空虛是諸天女愛樂大乘欲聞大乘  
聞已亦能爲人廣說渴仰大乘旣自充足復能  
充足餘渴仰者守護大乘若有異學憎嫉大乘  
勢能摧滅如雹摧草護持戒行威儀具足善能  
隨順一切世間度未度者脫未脫者於未來世

當轉法輪紹三寶種使不斷絕脩學大乘以大  
莊嚴而自莊嚴成就如是無量功德等慈衆生  
如視一子亦於晨朝日初出時各取種種天木  
香等倍於人間所有香木其木香氣能滅人中  
種種臭穢白車白蓋駕四白馬一一車上皆張  
白帳其帳四邊懸諸金鈴種種香華寶幢幡蓋  
上妙甘饌種種伎樂敷師子座其座四足純紺  
琉璃於其座後各各皆有七寶倚牀一一座前  
復有金几復以七寶以爲燈樹種種寶珠以爲  
燈明散妙天華徧布其地是諸天女設是供已  
心懷哀感涕淚交流生大苦惱亦爲利益安樂  
衆生成就大乘第一空行顯發如來方便密教

亦爲不斷種種說法往詣佛所稽首佛足繞百  
千帀而白佛言世尊唯願如來哀受我等最後  
供養如來知時默然不受諸天女等不果所願  
心懷憂惱却在一面默然而住爾時復有九恒  
河沙諸龍王等住於四方其名曰和脩吉龍王  
難陀龍王婆難陀龍王而爲上首是諸龍王亦  
於晨朝日初出時設諸供具倍於人天持至佛  
所稽首佛足繞百千帀而白佛言唯願如來哀  
受我等最後供養如來知時默然不許是諸龍  
王不果所願心懷愁惱却坐一面爾時復有十  
恒河沙等諸鬼神王毗沙門王而爲上首各相  
謂言仁等今者可速詣佛所設供具倍於諸龍

持往佛所稽首佛足繞百千匝而白佛言唯願  
如來哀受我等最後供養如來知時默然不受  
是鬼神王不果所願心懷愁惱却坐一面爾時  
復有二十恒河沙金翅鳥王降怨鳥王而爲上  
首復有三十恒河沙乾闥婆王那羅達王而爲  
上首復有四十恒河沙緊那羅王善見王而爲  
上首復有五十恒河沙摩睺羅伽王大善見王  
而爲上首復有六十恒河沙阿脩羅王睽婆利  
王而爲上首復有七十恒河沙陀那婆王無垢  
河水王跋提達多王等而爲上首復有八十恒  
河沙等羅刹王可畏王而爲上首捨離惡心更  
不食人於怨憎中生慈悲心其形醜陋以佛神

力皆悉端正復有九十恒河沙樹林神王樂香  
王而爲上首復有千恒河沙持呪王大幻持呪  
王而爲上首復有一億恒河沙貪色鬼魅善見  
王而爲上首復有百億恒河沙天諸淫女藍婆  
女鬱婆尸女帝路沾女毗舍佉女而爲上首復  
有千億恒河沙地諸鬼王白濕王而爲上首復  
有十億恒河沙等諸天子及諸天王四天王  
等復有十萬億恒河沙等四方風神吹諸樹上  
時非持華散雙樹間復有十萬億恒河沙雲  
雨神皆作是念如來涅槃焚身之時我當雲雨  
令火時滅衆中熱悶爲作清涼復有二十恒河  
沙大香象王羅睺象王金象王甘味象王紺

眼象王欲香象王等而爲上首敬重大乘愛樂  
大乘知佛不久當般涅槃各各拔取無量無邊  
諸妙蓮華來至佛所頭面禮佛却住一面復有  
二十恒河沙等師子獸王師子吼王而爲上首  
施與一切衆生無畏持諸華果來至佛所稽首  
佛足却住一面復有二十恒河沙等諸飛鳥王  
鳧鴈鴛鴦孔雀諸鳥乾闥婆鳥迦蘭陀鳥鸚鵡  
鸚鵡俱翅羅鳥婆嚩伽鳥迦陵頻伽鳥耆婆耆  
婆鳥如是等諸鳥持諸華果來至佛所稽首佛  
足却住一面復有二十恒河沙等水牛牛羊往  
至佛所出妙香乳其乳流滿拘尸那城所有溝  
坑色香美味悉皆具足成是事已却住一面復

有二十恒河沙等四天下中諸神仙人忍辱仙  
等而爲上首持諸香華及諸甘果來詣佛所稽  
首佛足繞佛三匝而白佛言唯願世尊哀受我  
等最後供養如來知時默然不許時諸仙人不  
果所願心懷愁惱却住一面閻浮提中一切蜂  
王妙音蜂王而爲上首持種種華來詣佛所稽  
首佛足繞佛一匝却住一面爾時閻浮提中比  
丘比丘尼一切皆集唯除尊者摩訶迦葉阿難  
二衆復有無量阿僧祇恒河沙等世界中間及  
閻浮提所有諸山須彌山王而爲上首其山莊  
嚴叢林蒼鬱鬱諸樹茂盛枝條扶踈陰蔽日光  
種種妙華周徧而有龍泉流水清淨香潔諸天

龍神乾闥婆阿脩羅迦樓羅緊那羅摩睺羅伽  
神仙呪術作倡伎樂如是等衆彌滿其中是諸  
山神亦來詣佛稽首佛足却住一面復有阿僧  
祇恒河沙等四大海神及諸河神有大威德具  
大神足所設供養倍勝於前諸神身光伎樂燈  
明悉蔽日月今不復現以占婆華散熙連河來  
至佛所稽首佛足却住一面爾時拘尸那城娑  
羅樹林其林變白猶如白鶴於虛空中自然而  
有七寶堂閣雕文刻鏤綺飾分明周匝欄盾衆  
寶雜厠堂下多有流泉浴池上妙蓮華彌滿其  
中猶如北方鬱單越國亦如忉利歡喜之園爾  
時娑羅樹林中閒種種莊嚴甚可愛樂亦復如

是是諸天人阿脩羅等咸覩如來涅槃之相皆  
悉悲感愁憂不樂爾時四天王釋提桓因各相  
謂言汝等觀察諸天世人及一切脩羅大設供養  
欲於最後供養如來我等亦當如是供養若我  
最後得供養者檀波羅蜜則為成就滿足不難  
爾時四天王所設供養倍勝於前持曼陀羅華  
摩訶曼陀羅華迦枳樓伽華摩訶迦枳樓伽華  
曼殊沙華摩訶曼殊沙華散多尼迦華摩訶散  
多尼迦華愛樂華大愛樂華普賢華大普賢華  
時華大時華香城華大香城華歡喜華大歡喜  
華發欲華大發欲華香醉華大香醉華普香華  
大普香華大金葉華龍華波利質多樹華拘毗

羅樹華復持種種上妙甘饍來至佛所稽首佛  
足是諸天人所有光明能覆日月今不復現以  
是供具欲供養佛如來知時默然不受爾時諸  
天不果所願愁憂苦惱却住一面爾時釋提桓  
因及三十三天設諸供具亦倍勝前及所持華  
亦復如是香氣微妙甚可愛樂持得勝堂并沙  
小堂來至佛所稽首佛足而白佛言世尊我等  
深樂愛護大乘唯願如來哀受我食如來知時  
默然下受時諸釋天不果所願心懷愁惱却住  
一面乃至第六天所設供養展轉勝前寶幢幡  
蓋寶蓋小者覆四天下幡最短者周圍四海幢  
最卑者至自在天微風吹幡出妙音聲持上甘

饒來詣佛所稽首佛足白佛言世尊唯願如來  
哀受我等最後供養如來知時默然不受是諸  
天等不果所願心懷愁惱却住一面上至有頂  
其餘梵眾一切來集爾時大梵天王及餘梵眾  
放身光明徧四天下欲界人天日月光明悉不  
復現持諸寶幢繒綵幡蓋幡極短者懸於梵宮  
至娑羅樹間來詣佛所稽首佛足白佛言世尊  
唯願如來哀受我等最後供養如來知時默然  
不受爾時諸梵不果所願心懷愁惱却住一  
面上爾時毗摩質多阿脩羅王與無量阿脩羅大眷  
屬俱身諸光明勝於梵天持諸寶幢繒綵幡蓋  
其蓋小者覆于世界上妙甘饒來詣佛所稽首

佛足而白佛言唯願如來哀受我等最後供養  
如來知時默然不受諸阿脩羅不果所願心懷  
愁惱却住一面爾時欲界魔王波旬與其眷屬  
諸天綵女無量無邊阿僧祇衆開地獄門施清  
淨水因而告曰汝等今者無所能爲唯當專念  
如來應正徧知建立最後隨喜供養當令汝等  
長夜獲安時魔波旬於地獄中悉除刀劍無量  
苦毒熾然燄火霆雨滅之以佛神力復發是心  
今諸眷屬皆捨刀劍弓弩鎧仗鉞稍長鉤金椎  
鉞斧鬪輪罔索所持供養倍勝一切人天所設  
其蓋小者覆中千界來至佛所稽首佛足而白  
佛言我等今者愛樂大乘守護大乘世尊若有

善男子善女人為供養故為怖畏故為誑他故  
為財利故為隨他故受是大乘或真或偽我等  
爾時當為是人除滅怖畏說如是呪

啍枳

吒

吒

陟嫁切  
羅啍枳

盧訶隸

摩訶盧

訶隸

阿羅遮羅

多羅

莎訶

是呪能令諸失心者怖畏者說法者不斷正法  
者為伏外道故護己身故護正法故護大乘故  
說如是呪若有能持如是呪者無惡象怖若至  
曠野空澤險處不生怖畏亦無水火師子虎狼  
盜賊王難世尊若有能持如是呪者悉能除滅  
如是等怖世尊持是呪者我當護之如龜藏六  
世尊我等今者不以諛諂說如是事持是呪者

我當至誠益其勢力唯願如來哀受我等最後  
食供爾時佛告魔波旬言我不受汝飲食供養  
我已受汝所說神呪爲欲安樂一切衆生四部  
衆故佛說是已默然不受如是三請皆亦不受  
時魔波旬不果所願心懷愁惱却住一面爾時  
大自在天王與其眷屬無量無邊及諸天衆所  
設供具悉覆梵釋護世四王人天八部及非人  
等所有供具梵釋所設猶如聚墨在珂貝邊悉  
不復現實蓋小者能覆三千大千世界持如是  
等供養之具來詣佛所稽首佛足繞無數而白  
佛言世尊我等所獻微末供具喻如蚊子供養  
於我亦如有人以一掬水投之大海然一小燈

助百千日春夏之月衆華茂盛有持一華益於  
衆華以亭歷子益於須彌豈當有益大海日明  
衆華須彌世尊我今所奉微末供具亦復如是  
若以三千大千世界滿中香華伎樂幡蓋供養  
如來尚不足言何以故如來爲諸衆生常於地  
獄餓鬼畜生諸惡趣中受諸苦惱是故世尊應  
見哀愍受我等供爾時東方去此無量無數阿  
僧祇恒河沙微塵等世界彼有佛土名意樂美  
音佛号虚空等如來應正徧知明行足善逝世  
閒解無上士調御丈夫天人師佛世尊爾時彼  
佛即告第一大弟子言善男子汝今宜往西方  
娑婆世界彼土有佛号釋迦牟尼如來應正徧

知明行足善逝世間解無上士調御丈夫天人  
師佛世尊彼佛不久當般涅槃善男子汝可持  
此世界香飯其食香美食之安隱可以奉獻彼  
佛世尊世尊食已入般涅槃善男子并可禮敬  
請決所疑爾時無邊身菩薩摩訶薩即受佛教  
從座而起稽首佛足右繞三匝與無量阿僧祇  
菩薩俱從彼國發來至此娑婆世界應時此間  
三千大千世界大地六種震動於是衆中梵釋  
四王魔王波旬摩醯首羅如是大衆見是地動  
舉身毛豎喉舌枯燥驚怖顫慄各欲四散自見  
其身無復光明所有威德殄滅無餘是時文殊  
師利法王子即從座起告諸大衆諸善男子汝

等勿怖汝等勿怖何以故東方去此無量無數  
阿僧祇恒河沙微塵等世界有世界名意樂美  
音佛号虚空等如來應正徧知十号具足彼有  
菩薩名無邊身與無量菩薩欲來至此供養如  
來以彼菩薩威德力故令汝身光悉不復現是  
故汝等應生歡喜勿懷恐怖爾時大衆悉皆遙  
見彼佛大衆如明鏡中自觀己身時文殊師利  
復告大衆汝今所見彼佛大衆如見此佛以佛  
神力復當如是得見九方無量諸佛爾時大衆  
各相謂言苦哉苦哉世間空虛世間空虛如來  
不久當般涅槃是時大衆一切悉見無邊身菩  
薩及其眷屬是菩薩身一一毛孔各各出生一

大蓮華一一蓮華各有七萬八千城邑縱廣正  
等如毗耶離城牆壁諸塹七寶雜廁多羅寶樹  
七重行列人民熾盛安隱豐樂閻浮檀金以爲  
却敵一一却敵各有種種七寶林樹華果茂盛  
微風吹動出微妙音其聲和雅猶如天樂城中  
人民聞是音聲即得受於上妙快樂是諸塹中  
妙水盈滿清淨香潔如真琉璃是諸水中有七  
寶船諸人乘之遊戲澡浴共相娛樂快樂無極  
復有無量雜色蓮華優鉢羅華拘物頭華波頭  
摩華分陀利華其華縱廣猶如車輪其塹岸上  
多有園林一一園中有五泉池是諸池中復有  
諸華優鉢羅華拘物頭華波頭摩華分陀利華

其華縱廣亦如車輪香氣芬馥甚可愛樂其水  
清淨柔輒第一鳧鴈鴛鴦遊戲其中其園各有  
衆寶宮宅一一宮宅縱廣正等滿四由旬所有  
牆壁四寶所成所謂金銀琉璃頗黎眞珠爲向  
周帀欄楯玫瑰爲地金沙布上是宮宅中多有  
七寶流泉浴池一一池邊各有十八黃金梯陛  
閻浮檀金爲芭蕉樹如忉利天歡喜之園是一  
一城各有八萬四千人王一一諸王各有無量  
夫人姪女共相娛樂歡喜受樂其餘人民亦復  
如是各於住處共相娛樂是中衆生不聞餘名  
純聞無上大乘之聲是諸華中一一各有師子  
之座其座四足皆紺琉璃柔輒素衣以敷座上

其衣微妙出過三界一一座上有一王坐以大  
乘法教化衆生或有衆生書持讀誦如說脩行  
如是流布大乘經典爾時無邊身菩薩安止如  
是無量衆生於自身已令捨世樂皆作是言苦  
哉苦哉世間空虛如來不久當般涅槃爾時無  
邊身菩薩與無量菩薩周匝圍繞示現如是神  
通力已持是種種無量供具及以上妙香美飲  
食若有得聞是食香氣煩惱諸垢皆悉消滅以  
是菩薩神通力故一切大衆悉皆得見如是變  
化無邊身菩薩身大無邊量同虛空唯除諸佛  
餘無能見是菩薩身其量邊際爾時無邊身菩  
薩及其眷屬所設供養倍勝於前來至佛所稽

首佛足合掌恭敬白佛言世尊唯願哀愍受我等食如來知時默然不受如是三請悉亦不受爾時無邊身菩薩及其眷屬却住一面南西北方諸佛世界亦有無量無邊身菩薩所持供養倍勝於前來至佛所乃至却住一面皆亦如是爾時娑羅雙樹吉祥福地縱廣三十二由旬大眾充滿間無空缺爾時四方無邊身菩薩及其眷屬所坐之處或如錐頭針鋒微塵十方如微塵等諸佛世界諸大菩薩悉來集會及閻浮提一切大衆亦悉來集唯除尊者摩訶迦葉阿難二衆阿闍世王及其眷屬乃至毒蛇視能殺人蟻螻蝓及十六種行惡業者一切來集陀那

婆神阿脩羅等悉捨惡念皆生慈心如父如母

如姊如妹三千大千世界衆生慈心相向亦復

如是除一闍提爾時三千大千世界以佛神力

故地皆柔軟無有丘墟土沙礫石荆棘毒草衆

寶莊嚴猶如西方無量壽佛極樂世界是時大

衆悉見十方如微塵等諸佛世界如於明鏡自

觀己身見諸佛土亦復如是爾時如來面門所

出五色光明其光明曜覆諸大會令彼身光悉

不復現所應作已還從口入時諸天人及諸會

衆阿脩羅等見佛光明還從口入皆大恐怖身

毛爲豎復作是言如來光明出已還入非無因

緣必於十方所作已辦將是最後涅槃之相何

其苦哉何其苦哉如何世尊一旦捨離四無量  
 心不受人天所奉供養聖慧日月從今永滅無  
 上法船於斯沈沒嗚呼痛哉世間大苦舉手推  
 背悲號啼哭支節顫動不能自持身諸毛孔涼  
 血灑地

大般涅槃經卷第一

鞞	漱	噎	拔
去音	瘦音	於結切	跋同用
鞞	澡	裁	拍
耕厄切	早音	才音	普白切
填	鬱	抑	推
田音	紆屈切	於力切	直追切
駿	膠	互	顫
俊音	交音	手音	戰音
酢	繒	掉	慄
昨醋二音	羨陵切	調吊切	栗音
齋	綵	嚼	哽
祖音	倉在切	才音切	更音切

豕 衆音  
快 央向切  
鬢 莫還切  
啞 乎合切  
敵 徒的切  
櫓 魯音

韋 于鬼切  
峻 私閨切  
鷄 尺脂切  
梟 皎堯切  
鵬 雕音  
淡 梯帝切

啞 湯卧切  
咎 咨此切  
惆 勅鳩切  
紺 甘暗切  
翅 施智切  
睽 尸衆切

霆 注音  
鳧 扶音  
鸛 衢音  
鵠 浴音  
嘻 喜音  
溝 古侯切

叢 獲紅切  
蒼 烏孔切  
蔽 必袂切  
鏤 漏音  
綺 墟彼切  
枳 章夜切

比 毗音  
鎧 開改切  
鉉 牟音  
狷 雙角切  
鉞 于月切  
鬪 鬪同

鬚 決犬切  
隸 麗音  
諛 羊須切  
醯 呼兮切  
燥 搔早切  
殄 田典切

塹 七陵切  
馥 房福切  
玟 梅音  
瑰 迴音  
錐 職追切  
鋒 捧蓬切

蟻 去羊切  
娘 良音  
蝮 芳伏切  
蝎 許謁切  
墟 去居切  
礫 曆音

